



傅詠婷 女士

閩南語 / 散文類 / 學生組

得獎作品 /

早時敢會當較晏ê

【得獎感言】

你著愛知影你的喙舌頂有佱濟文化，彼攏是你的根、你的使命。

感謝各位評審予我這擺機會，這是一篇實驗的散文，寫一个睏袂去的暝時，寫一个siōnn東siōnn西的暗暝，寫一个平凡無聊的我家己，凡勢會當無細膩予逐家有共鳴。我希望用臺語描寫上日常的生活，用臺語記錄每一个幼細的心情，用臺語來書寫未來的人生。

早時敢會當較晏ê

總算是到厝矣。

十二點十分，予捷運載轉來到你佇臺北稅ê厝，狹甲袂輸是咧關犯人ê，和窗仔門也無，遮是你家己ê空間。無閒tshì-tshà規工矣，竟然猶無法度直接歇睏。日時開會ê資料，新ê任務，也只有這個無人攪吵ê時陣，通好好仔整理，嘛無siōnn欲做工課ê奴才，只是身軀邊ê人攏遐認真，若無較拍拚--eh，是會驚hǒng見笑ê，歇睏ê時間只好kā放棄一寡，捏一下，泡一杯燒ê可可仔予家己啉，當做今仔日上尾一个工課ê動力。

兩點二十八分，你共檔案整理甲好勢甲，電腦囡一邊，雄雄感覺腹肚有寡枵，來煮一碗泡麵好矣。卵一粒敲lueh，青菜一把加lueh，冰箱拍開ê時陣，邊仔角彼罐mi-sóo-sí-luh，予你siōnn起阿媽ê手路菜。下一屑屑仔mí-sooh，閣加豆腐lueh，有時仔嘛真享受煮食ê過程，無細膩閣煮甲sionn腥操，敢若會食袂了，你欸一喙仔湯，湯頭恰阿媽煮ê，猶原有淡薄仔精差，毋知影阿媽這馬過了敢好，實在應該愛揣一个時間轉去kā看，坐火車是真了時間，高鐵閣遐貴。你閣欸一喙仔麵，mí，這擺ê時間掠甲袂糶，日時佇外口食飯，若毋免ná食ná開會，你嘛會siōnn欲趁這個時間共訊息回回eh，攏無法度專心食飯。若到暗頓，嘛著愛恰一寡朋友交陪，共一寡頂司phôo-phôo-thánn-thánn，tsín是總算有家己ê時間，通小喘一下。

三點空八分，一个無細膩，彼碗麵予你猝了了，你掠你ê肚皮金金相，肥肉若tshiōnn是有較濟，甜ê恰糲ê誠實袂使sionn食，毋過彼都定定是有人咧遐喊講，敢欲做伙叫送食食ê，若無鬥一下，總是會驚逐家感覺我歹鬥陣。若毋開始管理食食，是有影會愈來愈大箍ê。你共衫攏褪褪去，欲laih洗身軀，落燒水ê聲音充滿規個浴間仔，燒氣聊聊仔讀tshing起來，你看著壁頂ê水痕，今搬來ê時陣猶無佇遐，日子一工一工過，嘛毋知影是當時開始積累ê，一下仔無注意，連鞭著恰當初時無全矣，你siōnn起少年時彼个綿精ê家己，看水痕恬恬仔積佇遐，袂輸是心內有啥物話，欲講，煞重重疊疊，啞口哲死困。是講這馬ê生活是猶會得過，你有一个閣細閣溼，毋過安全ê所在通蹣。燒水沖lueh，身軀感覺真四序，嘛著愛怪家己有咧癮社群網路，洗身軀ê時間，誠實是你最後留予家己ê時間，定定是佇外口走從規工，感覺家己攏咧無閒別人ê代誌，干焦睏洗身軀ê時間，予你毋免ti遐懷疑家己是為啥人咧活。規工ê ià-siān恰a-sa-puh-luh，攏kā洗洗予去，憂愁上好嘛做伙去。身體洗好

感覺真聳勢，只是肩胛頭佢領頸ê痠疼，敢若是真正愛去看醫生矣，真費氣，是án-ná會遮爾仔麻煩，敢講是真正老矣？這個身體，嘛毋知猶愛陪你做伙生活佹久，原仔著愛好好仔kā保養才是，你共鏡內ê家己斟酌看，氣色若tshiōnn有較好洗身軀進前，是講面皮頂頭是閣生柱仔矣，袂使擠，愛忍予牢，真濟代誌佢擠柱仔仝款，若處理了sionn急sionn雄、硬欲擠，著會留疤，kā囡leh莫插伊，顛倒是上相安無事ê處理方式，社會改變你真濟，其實有時仔猶是會ti遐思考，án-ná ê生活才是你欲愛ê。你煞看著目矧尾有新ê皺痕，無，來貼一个面膜好矣。

四點二十分，你ná貼面膜ná痛戲，前站仔較無閒，tsín感覺早著應該愛án-ne享受生活矣，內底ê主角是拚性命咧做工課，上尾仔完成家己買厝ê願夢，你真欣羨，翻頭來看家己和一个窗仔都無ê房間，買厝ê心願你嘛有，總是，凡勢佇路lìn去拄著一隻駁仔¹閣較有可能lah，無lah共房間款款ê，看蹠起來會感覺較闊無。

五點空四分，你tshiau著一个毋值錢，對你來講煞真要緊ê物件，這是讀國中ê時陣，彼个你這世人頭一个佢意ê人送ê，是伊予你知影啥物是心跳、啥物是怨妒，雖然是因為伊生日才全班一人送一个ê，原仔是一个真重要ê回憶，你笑家己惜情甲án-ne，留遮爾久，猶是kā囡轉去，房間整理好勢矣，有變較清氣，心情嘛袂穰，好來睏矣。

六點空四分，你用棉被共家己包起來，繼手共youtube抑lueh，頭一个推薦ê影片是哲學分析tsín上tshìng ê電影，你看lueh著牢leh矣，tsuánn一部閣一部，愈看愈有趣味，其實你頭腦嘛袂穰，逐不時會思考一寡人生問題，高中彼時，嘛毋是無認真考慮過，只是序大都一直跳針，問你讀彼出業了後欲創啥貨，驚你tsuánn拈去，你有影毋知欲án-ná共in講，只好接受厝內底無富裕ê事實。tsín顛倒感覺，彼當時若是有堅持，凡勢這馬ê頭路著袂佢你ê興趣無底代矣。唉，這敢真正是彼種干焦好額人才有機會通眠夢ê社會？

七點十五分，煞煞去，siōnn空siōnn縫無意義，較早睏較實在。你關火，倒予好勢，目矧矧矧，心肝內，煞原仔無法度放下佢家己相閃身ê未來，一个遙遠毋過熟耳ê me-lóo-tih雄雄飛入你ê頭殼內，是早前佇學校參加歌唱比賽ê彼條歌，你才siōnn起你彼擺有著名，閣差一點仔欲去報名電視頂ê選秀節目，細漢ê時陣，嘛siōnn過欲做歌手，這馬煞成做一个，逐項都bat一寡、逐項都毋精光ê普通人。你用手机仔放彼條歌，細細聲唱予家己聽。

八點空六分，你去方便，看著窗仔外一个細漢查埔囡仔咧耍炮仔，天誠實咧光矣。天光了後，你ê時間就袂輸是愛提去送人ê款，愛穿予襯紮，愛笑，袂當使性地。定定會懷疑家己ê辛苦是為著啥，總是感覺，是án-ná這大漢ê生活，佢細漢時所siōnn ê會遮爾仔無仝。日頭落山，親tshiōnn一種解脫，予逐家有時間通彌補日時的遺憾；月娘ê光，親tshiōnn一種保護，予其實無siōnn欲見面ê人，會當享受家己一个人ê時間。早時若到，夜色雲煙，著閣愛共家己梳妝打扮hōo好勢，笑面戴leh，共駁仔ê彼枝角藏hōo好，假做一隻馬，才袂hōng叮上目。

你sô轉去棉被內底，愛睏矣，今暗開真濟時間咧佢家己講話，有曾經的過去，有寄望的未來，食甲這個歲數，故事袂少，未來嘛猶真長，生活有好抑有歹、有甘抑有苦，平凡ê你，出世ê時陣無金湯匙通合，嘛無拄著貴人，有時仔是會摸飛，毋過猶算是一个認真生活ê囡仔。歇睏了後，原仔愛繼續向前行，著趁早時進前，好好仔kā睏一醒。你提手機仔來看時間——閣一分鐘，亂鐘仔著欲giang矣……早時，敢會當較晏ê？

作者註：

1. Unicorn，《廣韻·沒韻》「駁：獸名。似馬，一角。駟，上同。〔蒲角切〕」